

Rechaso di politiconan pro extranhero

Reaccion di pueblo riba imigracion masal

ORANJESTAD (AAN) Pueblo di Aruba poco poco ta lantando for di e soño politico cu e tabata aden pa ultimo 15 aña y awor ta realizando cu pais Aruba ta bayendo den e mesun direccion desastroso cu imigracion sin limite a causa na Europa y otro paisnan rond mundo.

Ayera tabata tin un par di hende cu pa convivencia politico y personal a bay haci como si fuera cu e articulo publica riba pagina dos di edicion di DIARIO tabata algo netamente anti extranhero y discriminatorio, siendo cu cualkier hende cu por lesa realmente bon Papiamento por a saca bon cla cu esey no tabata e caso.

Discriminatorio ta ora cu politiconan local ta hiba un maneho unda e yiu di tera ta keda sin trabao, e yiu di tera no ta haya tereno erfpacht mes lihe of facil cu cierto hende y gruponan di exterior si ta haya bao di circunstancianan hopi straño.

Discriminatorio ta ora cu un Arubiano no ta haya trabao pasobra e maneho di gobierno ta crea e posibilidad pa den diferente sector na Aruba abuso worde haci cu cuponan di trabao unda ta abusa di extranheronan y e Arubiano mes no ta haya trabao pasobra e Arubiano no por bay traha pa salario bao di e minimo stipula pa ley.

Discriminatorio ta ora cu bo ta aplica abuso na pia di trabao contra extranheronan y bo no ta tuma Arubiano den servicio pasobra bo sa bon cla cu Arubianonan no ta

wanta abuso di ningun hende.

Discriminatorio ta ora cu un Arubiano aplica pa u permit pa tereno pa negoshi of pa cualkier proyecto, e no ta haya e mesun privilegio cu cierto hendenan di exterior of gruponan di exterior si ta haya bao di circunstancianan straño y dudoso.

Discriminatorio ta ora cu bo ta permiti pa na Aruba diferente radio emisora por bay over na transmiti completamente na un idioma cu no ta di aki y bo no ta actua contra esaki.

Discriminatorio ta ora cu extranheronan ta worde abusa pa traha na cierto medionan di comunicacion radial unda nan no ta haya un pago husto y riba dje nan no tin e preparacion tampoco pa por traha na radio.

Discriminatorio ta ora cu bo ta abusa di e ser femenino di exterior y ta pone bao di presion pa e uza su curpa pa e por haya permit pa por keda traha of biba na Aruba; esey ta abuso!

Pueblo a reaccion ayera y lo sigui reacciona y un di e desaroyonan cu tin pueblo hopi preocupa ta e forma con ultimo dos aña Aruba ta worde spañoliza y esaki a cuminsa via medionan di comunicacion tambe unda mas y mas radio emisora ta bay over pa transmiti na idioma spaño.

Loke falta pa ta aki un par di tempo un Arubiano ta bay na un tienda y e ta haya mescos cu ta e caso na Miami, cu tin borchí poni riba porta di tienda unda ta anuncia cu na e tienda ey e personal ta papia Ingles y aki e lo bay ta Papiamento!

Si pueblo di Aruba no lanta para y defende loke tur ta encera cultura, identidad y patrimonio nacional di e Arubiano (no ta importa di ki origen e ta; esun cu ta sinti su mes Arubiano den alma y cuerpo) den futuro e pueblo aki lo worde confronta cu un dominio extranhero cu ya caba sistematicamente ta lantando cabes.

Pa cuminsa ataca e problema y busca un

solucion real, e pueblo di Aruba mester bay back na e normanan di balor y respet mutuo di antes y laga envidia y materialismo crea door di politiconan un banda; union ta forsa.

E arma mas factible pa actualmente combati e problema di imigracion masal pa Aruba ta pa pueblo nes rechaza tur politico cu ta riaci mal uso di nan poder politico pa seduci y manipula extranheronan pa vota pa nan y esey ta loke pueblo a reacciona tambe riba dje ayera..

Esun cu sostiene y vota pa un politico (no ta importa di cua

partido) cu ta privilegia gruponan di exterior pa asina e por sigura su salario gordo como parlamentario of como ministro of coordinador den banda, no mester bin yora den futuro cu e como yiu di tera no ta doño mas den su mesun pais.

Pais Aruba no tin e capacidad mas pa centenares of miles di hendenan di exterior bin establece nan mes aki y tensionnan den pueblo ta bayendo den un direccion cu tardi of tempran lo bay crea problemanan social hopi grandi cu por tin consecuncianan desastroso pa tur hende biba riba e isla aki.

Bingo di S.V. Dakota a cambia di fecha

ORANJESTAD (AAN): Esnan di SV Dakota a indica na DIARIO, cu nan Bingo a cambia di fecha.


Awor e Bingo a worde posponi pa dia 27 di Augustus 2005. E Bingo ta pa recauda fondo pa asina

cuminsa cu un school di futbol combina cu un asina yama "Tra'i Merdia" pa e bario di Dakota caminda e muchanan lo haya entre otro "Huiswerkbegeleiding" y nan lo por practica futbol riba un nivel halto.



Las Americas

(Near Burger King)
Playa (Caya Grandi)
Tel: 582-1576



Maletin Silver
Antes Afl. 55,=
Awor Afl. 45,=